



18. august 2023

UKA 2023/111

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni meeqqat angerlarsimaffiup avataanut inissiisarnernut atatillugu aningaasartuutit annertuumik annertusiartuinnartunut qanoq annikillisaasinnaanerluta, immikkut ilisimasallit suleqatigiissitaq piviusorsiortunik innersuussisussatut pilersinneqarnissaat anguniarlugu Naalakkersuisut peqquneqassasut Inatsisartunut aalajangiiffigisassatut siunnersuut. Tamanna kommuunit angerlarsimaffiup avataanut inissiisarnernut aningaasartuutigisartagaannut annertusiartuinnartunut annikillisaanissaq siunertaralugu. Innersuussutit meeqqat inerikkiartornerannut, toqqissisimanerannut aammalu illersorneqarnerannut innarliissanngillat. Innersuussutit UKA 2024 nallertinnagu saqqummiunneqassapput.

(Inatsisartunut Ilaasortaq Bjørk Lange Olsen, Demokraatit)

Tungavilersuut

Inuiaqatigiit peqqissumik toqqissisimanartumillu ingerlassappata aammalu innutaasut toqqissisimallutik inooqataasinnaassappata ilaqutareeqarneq pingaarnersatut inissisimasoq Demokraatiniit isumaqarpugut. Ilaqutariit tamarmik ingerlalluartut aammalu inuiaqatigiitsinni sumiginnaasarneq annertuumik ajornartorsiutaasimanngitsuuppat nuannaarutissagut annertunerussagaluarput.

Ajoraluartumilli meeqqanik sumiginnaasarneq ima annertutigaaq, nunatsinni angerlarsimaffiup avataanut inissiisarnernut aningaasartuutit qaffariarujussuarsimallutik. §37 tungavigalugu apeqquteqaatigisimasannut normu 95-2023 akissutini, ima erserpoq¹:

- Qeqertalik Kommuuniani aningaasartuutigineqarsimasut 2018-mi 13,5 million koruuniniit 2022-mi 19,2 million koruuninut qaffariaateqarsimapput.

- Kommuuneqarfik Sermersuumi 2018-mi 242,2 million koruuniniit 2022-mi 278,9 million koruuninut qaffariaateqarsimapput.

- Avannaata Kommuuniani 2018-mi 51,3 million koruuniniit 2022-mi 71,1 million koruuninut qaffariaateqarsimallutik.

Qeqqata Kommuunia kisitsisit 2028-meersut kisimik nassiussimaaat, matumanilu ineriartorsimaneq ersersinneqarsinnaasimanani. Kommune Kujallermiit kisitsisit ataqqatigiinngillat taamaattumillu oqaaseqarfigissallugit pissusissamisoorsimanani.

¹ Akissut § 37 apeqquteqaat normu 95-2023



Eqqummaariffigaara qinigaaffik matumani pineqartumut periusissiamik sanasoqartoq, angerlarsimaffiup avataanut inissiisarnarit annikillisarniarlugit pinaveersaartitsineq². Tamanna tunngaviatigut tapersersornarpoq aammalu Demokraatiniit neriutigaarput periusissiaq, angerlarsimaffiup avataanut inissiisarnarit annikillisarnissaannut aammalu meeqqat toqqissisimallutik pitsaanerumillu inuuneqalersinnaanissaannut aqutissiuussissasoq. Kisiannili periusissiaq una tapersersornaqisoq pineqartumut qanoq aningaasartuutunik annikillisaasinnaanitsinnik sammisaqanngilaq. Kisitsisit kommuuninangaanneersut ersarissumik takutippaat angerlarsimaffiup avataanut inissiisarnernut aningaasartuutit annertoorujussuarmik annertusiartortut, taamaasillutillu kommuunit aningaasaqarnerannut ajornakusoortitsillutik. Ajornartorsiut tamanna qisuariarfiginissaa pingaaruteqarluinnarpoq, ineriartornerlu tamanna pitsaanngitsoq ajoquserneqanngitsutullusooq inissisimatiinnarnagu.

Tamanna tunngavigalugu immikkut ilisimasallit innersuussutissanik sanassasut kissaatigaara, qanoq angerlarsimaffiup avataanut inissiisarnernut aningaasartuutit annikillisarneqarsinnaanersut. Matumani uannut pingaaruteqarluinnarpoq naqissusissallugu innersuussutit meeqqap inerikkiartornissaanut, toqqissisimanissaanut aammalu illersorneqarnissaanut innarliissanngitsut.

Taamatut oqaaseqarlunga Naalakkersuisut partiillu sinneri siunnersuutinnut qanoq isumaqarnerisut tusassallugu qilanaaraara neriullungalu siammasissumik taperserneqarumaartoq.

Pisortanut aningaasatigut allaffissornikkullu kingunissai

Immikkut ilisimasalinnik suleqatigiissitaliornissamik siunnersuutigineqartoq 1 million koruunit sinnernissaat naatsorsuutigineqanngilaq (Atorfilik ataaseq ukiuni marlunnik sulineranik naleqassalluni)

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq.

Innuttaasunut aningaasatigut allaffissornikkullu kingunissai

Soqanngilaq.

² Pitsaaliuinerit pitsaanerit, inissiinerit ikinnerit: Ilaqutariinni pitsaaliuinerimik suliaqarnermut iliuusissatut pilersaarut 2022-2030 – Naalakkersuisunit saqqummersitaq november 2022